

АКАФИСТ СВЯТОЙ РАВНОАПОСТОЛЬНОЙ НИНЕ ПРОСВЕТИТЕЛЬНИЦЕ ГРУЗИИ

Кондак 1

Избранной служительнице слова Божия и подвигом святых Апостол подражательнице, залог благословения от Божия Матере, честный Крест приявшей и во стране Иверстей водрузившей, благодарственная хваления восписуем ти, цевнице духовная, святая равноапостольная Нино. Ты же, яко имущая дерзновение ко Господу, не престай молящися избавити нас от всяких бед и скорбей, да со умилением благодарственно зовем ти: Радуйся, святая, равноапостольная Нино, просветительница Грузии.

Икос 1

Ангела дивна страны Иверских яви тя всея твари Создатель, обратити народы земли сея, седящия во тьме и сени смертней, от прелести идольских и призвати их во язык свят, в люди обновления. Темже мы, благодаряще Бога, прославляем тя яко просветительницу и молитвенницу нашу и прилежно зовем ти:

Радуйся, пречудная избранница Божественного Промысла;
радуйся, дивно процветшая розго благочестиваго корене.

Радуйся, сосуде благодати преизрядный;
радуйся, вместилище благодатных силы.

Радуйся, Пресвятая Девы Богородицы верная посланница;
радуйся, прехвальная апостолом подражательница.

Радуйся, во благовестии первозванному Андрею поревновавшая;
радуйся, еюже лжа идольская попрана бысть.

Радуйся, еюже святая вера насадися;
радуйся, еюже нам земным путь к небесем показуется.

Радуйся, святая равноапостольная Нино, просветительница Грузии.

Кондак 2

Видяще исполнение Божественного о людех смотрения Отца Небеснаго, Единородного Его Сына и Святаго Духа, воздвигшаго пророки и апостолы ко спасительному служению и нашего ради обращения к свету Евангельских истины избравшаго святую равноапостольную Нину, вопием к Богу: Аллилуя.

Икос 2

Разум Божественный возжелевши уразумети святая Нина, не единожды испытоваше от наставницы своея Нианфоры, яже известна быша о Господе Спасителе нашем и Его святом хитоне, наученная же от нея истинными познанием, восхоте поклонитися вседрагому хитону и месту подвигов святых апостол. Мы же, благоговения к жизни святая Нины исполненнии, прославляем ю сице:

Радуйся, истины Царствия Божия уразумети имущая;
радуйся, от юности Христа возлюбившая.

Радуйся, от младости материю своею Сусанною благочестию наученная;
радуйся, отца своего Завулона утешение.

Радуйся, святителем Иувеналием в страсе Божии упасенная;
радуйся, Божиим словесем обученная.

Радуйся, во святым граде Иерусалиме возращенная;
радуйся, течением своим к славе Божией во младости праведных удивившая.
Радуйся, земным благом небесная предпочтетшая.

Радуйся, святая равноапостольная Нино, просветительнице Грузии.

Кондак 3

Сила Вышняго воздвигши тя, святая Нино, любовию благочестия, желанием поклонитися хитону Господню и ревностию апостольскою, постави тя яко светильник лучезарен, да приемлющий от тебе свет Богоразумия взывают к Богу: Аллилуя.

Икос 3

Имущи святая Нина непоколебимую ревность ко благоугождению Господеви, возгаращеся желанием прийти во страну Иверскую и поклонитися тамо сокровенным святыням. Мы же, видящие в ней таковое святое ревнование, возопим к ней:

Радуйся, измлада суetu мира презревшая;
радуйся, истинную мудрость возлюбившая.

Радуйся, верное сокровище Богомудрия в Божественном учении обретшая;
радуйся, возлюбивших суetu мира добродетельным житием превозшедшая.

Радуйся, на непоколебимем камени заповедей Христовых утвердившаяся;
радуйся, преданностию воле Божией Ангелы и люди удивившая.

Радуйся, постом и молитвою плоть свою духови покорившая;
радуйся, любовию своею ко храму Божию томужде многи научившая.

Радуйся, добротою нрава к служению апостольства уготовившаяся;
радуйся, чрез добродетельное житие свое сосудом Духа Святаго соделавшаяся.

Радуйся, святая равноапостольная Нино, просветительнице Грузии.

Кондак 4

Бурею житейских страстей смущаеми, недоумеем, како достойно воспевати твое дивное мужество, святая Богоизбранная Нино, не устрашила бо ся ее и исполнити хотение свое, еже шествовати о имени Христове во языческий град Рим. Пречистая же Матерь Господа нашего благоизволи дати ти честными руками Своими Святый Крест и призвати тя ко благовестию спасения во стране Иверстей всем хотящим взывать Богу: Аллилуя.

Икос 4

Слышав святитель града Господня Иувеналий, яко Пресвятая Богородица призва тя проповедати слово Божие во жребии Ея, во стране Иверстей, и дарова ти в видении Крест, егоже ты обвила еси власы своими, нача славити Бога, спасающего человека, и звати тебе сице:

Радуйся, благодатию Божию приосененная;

радуйся, смиренiem духа дерзновение ко Господу Иисусу и Пречистой Его Матери приобретшая.

Радуйся, обрадованная явлением Богоматере;

радуйся, пресладкая словеса от Божия Матере слышавшая.
Радуйся, с Нею яко со другинею беседовавшая;
радуйся, благовейно иерусалимскою братиею почтенная.
Радуйся, уготование ко просвещению нашему незаходимым светом;
радуйся, свеще, Богом возжденная, во еже разгонити мрак нечестия.
Радуйся, честный Крест залог твоего преуспения во благовестию приимшая.
Радуйся, святая равноапостольная Нино, просветительнице Грузии.

Кондак 5

Боготечною звездою явися, святая Нино, возсиявши нам изволением Пресвятыя Владычицы
наша Богородицы и просветивши нас благовестием слова Божия. Сию небесную путеводницу,
сияющую славою подвигов благочестия и утешающую выну своею помощью всех нас,
притекающих к ней с мольбами, ублажающе, наипаче восхвалим Бога, явившаго святую Нину
ходатаицею о нас, и возопием Ему: Аллилуя.

Икос 5

Видевше Христовы невесты, яже со святою Ниною и Рипсимиею постом и молитвою спасахуся,
нечестивая помышления беззаконновавшаго Диоклитиана, хотящаго Рипсимию пояти в жену
себе и идолослужению научити, вся купно бежаша тайно из идолнаго града Рима во страну
Арменскую; таможе преданы бяху смерти повелением язычествовавшаго царя Тивридата.
Святую же Нину Господь от сетей Диоклитиана и Тивридата спасе и приведе ю благовестия
ради слова Евангельского во Иверию. Темже и мы, радующеся сему промышлению Божию о
спасении людей, восхваляем Божию посланницу, святую Нину, зовуще:

Радуйся, пребыванием своим в Риме путь благовестия себе уяснившая;
радуйся, несокрушимостию духа и дивным мужеством в служении слова Божия
прославившаяся.
Радуйся, трудный путь во Иверию безропотно во славу Божию прошедшая;
радуйся, благодатию Божию от руки Диоклитиана и Тивридата избавленная.
Радуйся, сущия у гор Триалетских гласом смирения огласившая;
радуйся, образом кротости мир в душах утвердившая.
Радуйся, вонею благоухания словес Христовых многие облагоухавшая;
радуйся, утверждение наше на пути спасения;
радуйся, яко тобою сподобляемся благ вечных.
Радуйся, святая равноапостольная Нино, просветительнице Грузии.

Кондак 6

Проповедница велия показася святая Нина, трудами бо и болезнями ея во Иверии Церковь
Христова насадися, мрак неведения отгнася, свет истины явися, намже, избавленным святою
Ниной от тьмы идолослужения, достойно есть взвывать ко Господу: Аллилуя.

Икос 6

Возсия стране Иверстей просвещение истины, егда святая Нина огласи благовестием град
Урбниси, отнюдуже мнози хождаху во Грузинский столъный град Мцхет кланятися лживым

богом Ормузду и Задену; сих идолов святая Нина молитвами своими сокруши и низроверже.
Темже и мы яко победительнику демонов восхвалим ю сице:
Радуйся, всемогущую силу истинного Бога во стране Иверстей первее показавшая;
радуйся, силою Всевышняго идола Ормузда поразившая.
Радуйся, гордость его мольбами своими посрамившая;
радуйся, останками его безсилие злого духа открывшая.
Радуйся, демона Задена и его аггелов поправшая;
радуйся, властителей тьмы отгнавшая.
Радуйся, бесильное царство их разрушившая;
радуйся, бесовский пламень нечестия угасившая.
Радуйся, бурным дыханием и огнем небесным служение идолом низровергшая;
радуйся, ревностию своею имя истинного Бога во Иверии прославившая.
Радуйся, сыновом тьмы свет Евангельский показавшая.
Радуйся, святая равноапостольная Нино, просветительнице Грузии.

Кондак 7

Хотя царь Мириан со слуги своими уразумети силу истинного Бога, сокрушившаго бесильныя идолы их, с недоумением глаголаше: что убо сие бысть, яко бози наши падоша? Дом же вертоградаря царева со Авиафаром, иереем Иудейским, дщерию его Сидонию и иными девами, благоговейно приявшими благовестие святыя Нины, познавше Господа Христа, возопиша к Богу: Аллилуиа.

Икос 7

Новая жизнь дадеся сыновом Иверии приятием от Нины слова истины, вси бо от нея крестишася банею водною во очищение свое от грехов и освящение и достойни соделашася приимати от Бога исцеления мольбами сея предстательницы; царь Мириан, благодатию Божию прозрев от слепоты, истинного Бога уразуме и Христа исповеда; царица Нана возста от одра болезни, отрок же их от духа злого свободися, и вси в купели паки бытия возродишася. Сего ради вси народи, видяще таковая, подолгу прославляют память святыя Нины, воспевающе ей сице:

Радуйся, неверие царя Мириана в веру обратившая;
радуйся, верное того исповедание приемшая.
Радуйся, томужде от слепоты исцеление подавшая;
радуйся, идолом поклонение угасившая.
Радуйся, свобождение от языческих заблуждений;
радуйся, очищение нравов.
Радуйся, избавление от искушений;
радуйся, дарование благодеяний требующим.
Радуйся, святая равноапостольная Нино, просветительнице Грузии.

Кондак 8

Странное чудо показася нам от Бога, яко Той, по благосердию Своему, страну Иверию содела

жребием Богоматере и, в знамение Своего благоволения обитающим в ней, от первых же дней благовествования о спасении людей посла честный хитон Господа Христа и над хитоном водрузи Живоносный Столп, от негоже и поднесь верующии получают исцеления; еще же и яви в ней дивную и преславную благовестницу святую Нину, и Крест со драгими ея власы ко утверждению святыя Своего веры дарова. Сицевая утешения имуще, мы, земнороднии, вознесем умы и сердца своя к горнему Царству и прославим благодеющаго нам Бога,зывающе к Нему немолчно: Аллилуия.

Икос 8

Вся объята была еси ты, святая Нино, мыслию о горнем и сего ради призвала еси дальних, неведущих Спасителя всех Господа Иисуса Христа, ко общению со наследники Небесного Царства, да и тии уведят величие славы единаго истиннаго Паstryя небесе и земли и прославят Его купно с горними жительми единеми усты и единем сердцем. Темже и мы, взирающе на ревность твою о спасении нашем, со умилением зовем ти таковая:

Радуйся, отверзение дверий крещения;
радуйся, наше к небесем приведение.

Радуйся, святым крещением Грузии велиею радостию святыя Ангелы исполнившая;
радуйся, царя Мириана к созиданию рукотворенного храма Богу Истинному подвигшая.

Радуйся, честный Крест от рождий лозных в нем водрузившая;
радуйся, залог сей любве своея ко Христу всем чадом Святыя Церкве оставившая.
Радуйся, сонмом подвижниц своих ко святому крещению всех призвавшая;
радуйся, сынов Иверии от купели восприявшая.
Радуйся, многи в разуме просветившая.
Радуйся, святая равноапостольная Нино, просветительнице Грузии.

Кондак 9

Всякое естество Небесных Сил радовалося, егда крещахуся сыны Иверии; един бо от небожителей во образе дивнаго человека явися и утверди чудотворный столп над ризою Господнею, научая всех со святою Ниною воспевати Богу: Аллилуия.

Икос 9

Ветии многовещаннii языки своими не возмогут изреши тебе достойныя хвалы,
равноапостольная Нино: славы бо ради Божия и спасения близких притекла еси от Мцхета
Карталинский и Кахетинский земли, идеже вся племена дол и высот, от тебе слышавша словеса
Божия, прияша спасение. Мы же, исполненни радости и благодарения за толикую любовь к
нам, от всего сердца взываем ти сице:

Радуйся, облечение наше багряницею крещения;
радуйся, поточе сладости, напоивый нас водою благочестия.
Радуйся, предивная поборнице веры Христовы;
радуйся, насаждение на земли рая небесного.
Радуйся, свобождение наше от рабства греховного;
радуйся, сокрушение сетей вражиих.

Радуйся, посечение злочестия;
радуйся, славная победо над неверием.
Радуйся, потребление злых обычаев и суеверий;
радуйся, сладкозвучная свирель веры.
Радуйся, святая равноапостольная Нино, просветительнице Грузии.

Кондак 10

Спасти хотящи от вечных погибели душу свою и близких, равноапостольная Нино, ты ревностию поревновала еси о славе Божией и подъяла еси многотрудный подвиг апостольский, темже убо и венцем апостольским украсилася еси от Господа на небесех, идеже со всеми святыми предстоящи с мольбою о нас воспеваеши Ему: Аллилуиа.

Икос 10

Стену нерушимую воздвиже тя Господь, святая Нино, и показа ограждением нашим от всяких бед и источником исцелений нетленное твоё тело во стране Кизикийстей, в вести Бодбе, идеже просветила еси ты царицу Софию и народ ея, да вси, предстательством твоим приемлюще от Бога милости, воззовем ти сице:

Радуйся, стено и покрове, не крывающийся от нашего притекания;
радуйся, готовая помоще ищущим спасения и истинного просвещения.
Радуйся, неоскудеваемый источниче благословений и милостей Божиих к почитающим тя;
радуйся, защитнице наша от погибели и напастей.
Радуйся, благочестивым людем верное поможение;
радуйся, истинное умирение мятущаяся плоти.
Радуйся, радование душ наших.
Радуйся, святая равноапостольная Нино, просветительнице Грузии.

Кондак 11

Пение всеумиленное принесла еси Пресвятей Троице, святая Нино, умом и делом до конца своей жизни Триединого Бога возлюбивши. Приими же от прославляющих тя умиленное пение и не презри гласа нашего, к тебе бо в напастех и скорбех прибегаем по Преблагословенней Богоматери и, на твоё предстательство уповающе, зовем Богу: Аллилуиа.

Икос 11

Светоприемная свеща, святая Нино, свет во тьме явльшая, егда преселяшеся от земли на небо, собра верныя чада своя от купели, яко отрасли новосаждения, и от них некия недужныя исцели, и предаде Богу непорочный дух свой. Видяще же блаженную ея кончину, царь Мириан и близний его горько плакаху и, со слезами отходныя песни поюще, взываху к ней таковая:
Радуйся, небесный Ангеле во образе земного человека явивыйся;
радуйся, невесто Христова, уневестившая Небесному Жениху Церковь Иверийскую.
Радуйся, благая просветительнице наша, в подвизех дневных и нощных течение совершившая;
радуйся, неустанная кормильнице, пищею Божественных словес нас питавшая.
Радуйся, непорочная голубице, возлетающая от земли в небесные обители;
радуйся, яко тело твоё в нетление облечеся.

Радуйся, яко святыя мощи твоя благоухания исполнишася;
радуйся, яко тех благоуханием мы, чада твоя, ныне наслаждаемся.
Радуйся, святая равноапостольная Нино, просветительнице Грузии.

Кондак 12

Благодать, данную ти от Бога, ведуще, по долгу празднуем всечестную память твою, святая равноапостольная Нино, и со умилением сердца притекающе ко образу твоему, честным Крестом украшенному, вседушно просим: сохрани нас в жизни сей в вере православней и во всяком благочестии и чистоте, да и в смертном успении нашем обрящемся достойни воспевати Богу: Аллилуия.

Икос 12

Поюще твое к Богу отшествие, всехвальная Нино, почитаем твой подвиг апостольства, величаем ревность по Бозе, хвалим долготерпение, славим смирение и ублажаем кончину твою, чудесы бо многими по отшествии твоем дивно прославилася еси; о нихже дивящиеся, вопием ти сице:

Радуйся, в сожительство Ангельских чинов и святых любезне приятая;
радуйся, собору апостольскому соприченная.

Радуйся, с лики избранных Божиих в чертог небесный всельшаяся;
радуйся, златая кадильнице, фимиам молитвы о нас Богу приносящая.

Радуйся, лицезрением небесных вечное блаженство вкушающая;
радуйся, с равноапостольными Константином и Еленою славимая.

Радуйся, народом Грузинским и всеми православными величаемая;
радуйся, чудес Христовых сокровище.

Радуйся, яко от честного Креста, власы твоими повитаго, исцеление душ и телес получаем;
радуйся, яко от святых мощей твоих благопотребную помощь обретаем.

Радуйся, святая равноапостольная Нино, просветительнице Грузии.

Кондак 13

О преславная и предивная просветительнице страны Иверсия, присная молитвеннице наша пред Спасителем Богом и Его Пречистою Материю, святая равноапостольная Нино! Нынешнее приемши приношение наше, умоли Господа Богоприятным твоим ходатайством избавити нас от всякия напасти, бед и скорбей, и сподобити вечных благ на небеси, да с тобою выну взыываем Богу: Аллилуия.

(Этот кондак читается трижды, затем икос 1 и кондак 1)

Молитва

О всехвальная и предивная равноапостольная Нино, воистину великое украшение Церкве Православныя и изрядная похвало народу Иверийскому, просветившая всю страну Грузинскую Божественным учением и подвиги апостольства победившая врага нашего спасения, трудом и молитвами насадившая зде вертоград Христов и возвращая его в плод мног. Празднующе святую память твою, притекаем к честному лицу твоему и благоговейно лобызаем всехвальный

дар тебе от Божия Матере, чудотворный крест, егоже ты обвила еси драгими власы твоими, и умилно просим, яко приснью предстательницу нашу: огради нас от всяких зол и скорбей, вразуми врагов Святыя Церкве Христовы и противников благочестия, охраняй твоё стадо, упасенное тобою, и моли Всеблагого Бога, Спасителя нашего, Ему же ты ныне предстоиши, да дарует народу нашему мир, долгоденствие и во всяком добром начинании поспешение, и да приведет Господь нас в Небесное Свое Царствие, идеже вси святии славословят всесвятое Его Имя ныне, и присно, и во веки веков. Аминь.